

Katiba baina yahe ze dola uhusu ze haki zaki ankiba, na zaki mudjtamaan, ne zaki tamaduni

Ukubaliwa utrilwa mhono, na uswahishishiwa na upviharwa ne le Baraza kuu lahe Djumuyian ya Madola harumwa le anzimiyo la 2200 A (XXI) lahe mwezi kume na sita wa desambro mwaha shihwi na madjana shenda na mengo mirandaru na sita

Li indjiya ndziyani ye mwezi ndraru ya janviye mwaha shihwi na madjana shenda na mengo mfukare na sita

Mukadima

Ze daula za kubali wo mkataba unu,

Ha uwakinisha ukaya, ha ustehi ze anzma za tekeleziwa harimwa lekatiba mshindzi lahe, Djumuyian ya madola, ha ukubali ye stehi yaho undru wahaina mwanadamu no usawa djumwa zehaki za wadjibu yikao yizo ndo mshindzi waho uhuria, no wizani wahaki, ne amani yahe duniya,

Ha ukubali ukaya ze haki zinu zi zalihana ho mpvamo waho udru wahaina mwanadamu,

Ha ukubali pvamwedja ne le anzimiyo la dunia lahe zehaki zaki binadamu ; ukaya yefaliki kuwu ya mwnadamu huru , yapukana na uhara waho usikini siki , kayina uparihana yitso mpaka haina mdru ngena hali za maensha za uruhusu yahondrane ne ze haki zaki ankiba, zaki mudjtmaan na utamaduni pvamwedja no mparihano wahe ze haki zaki maensha, na siyasa,

Ha wakinisha ukaya ye le katiba mshindzi lahe ye djumuyian ya madola li lazimisha mastehi ya kweli yahe zehaki ne ze nyihuria zaki binadamu,

Ha upvimisa ukaya haina mdru ngena wadjibu za utekeleza usoni mwe mwnanya na usoni mwa wo mudjtamaan wahahe ha ukazana yatriye mvuu na ustehi ze haki za kubalihana harimwa le katiba linu.

Wa wafikiyana harimwa ze faslu za dunga zinu :

Djuzo ya handa

Faslu ya handa

1. Haina wandru ngwaona yehaki ya udjitsawulia yeziliyo mwafaka nawo. Holiho nde haki yinu, ngwadjo udjuwa utsunguwa ha unafasi ye hali ya mkayo waki siyasa na utsauwa ha unafasi ye heli yahe le tumo laki Ankiba, na no mkayo waki maensha na utamaduni.
2. Ha ukamilisha ze anzma za hao haina wandru ngwadjo udjuwa utamalaki haunafasi wo utadjiri wahao na ne maandini mshindzi, pvatsina udhulumu ze wadjibu zalawana no mshirikiyano waki ankiba wahao ne ze daula za dunia, zakaantsi harumwa nguzo yahe ze faida za haina daula ne mishindzi yahe ze hukma za kidunia za madaula. Haina hali yoontsi kapvatsi umati wudjo udjuwa upvohwa yezana za utsongesa wo myenshi wahao.
3. Ye ze daula za husulwa no mkataba unu, pvamwedja ne ze daula dhwamana zahe ze ntsi zitso huriya ne ze ardhui zilo djumwa upvirilizi wa daula zidrwadji, yilizimu wa sahilishe wo mtekelezo wahe ze haki zahe ze nyimati za udjikaya na ustehi yehaki yiyo, ha udunga ye mishindzi yahe le Anzimiyo mshindzi lahe Djumuyia ya madola.

Djuzo yapvili

Faslu ya pvili

1. Haina daula ya husulwa no mkataba unu geyirengao anhadi ya usayidiya wo mtekelezo ze haki zakubaliwa harumwa lekatiba linu he ze djiha zoontsi, hususwan ha dziya za uvoti shariaan, reka ndiyo wiyotche hau ha utsanganyiha na daula zindrwadji, hususwan ha upande wa ki ankiba na swanaan za teknik, ha urumiya ze ntchinda yilo nizo, ha uruhusu wo mtriyo ndziyani ha mbapvi ha mbapvi ze haki za dhukurulwa pvanu.
2. Ze daula za husulwa ne lekatiba linu ngazidjitoleyao yili udhwamini uka ze haki za haki za holwa harimwilo ngazidjo utekeleziwa pvatsina ubaguzi utsoka woontsi waki kabila, rangi, mshe hau muume, lugha, dini fikira za siyasa hau, fikira zindrwadji, pvatsina ubaguzi wa mzalihano harumwa daula fulani, hau pulasi fulani yamdru harumwa wo

mudjtamaan, utadjiri, mzalihano hau drongo zidrwadji.

3. Ze ntsi zilo ndziyani za mayendeleo, hau triya wizanini ze haki zki binadamu ne Ankiba yahazo, ngazidjo udjuwa zi pange yenamna ya udwamini ze haki zaki Ankiba za kubaliwa ne lekatiba linu.

Faslu ya raru

Ye ze daula za pasiwa ne le katiba linu ngazi djitoleyao yili udhwamini wo usawa wahaki wa mdrumshe na mdrume harumwa ze haki piya zaki Ankiba na mudjtaamaan na utamaduni hama nde heli zatekeleziwa ne lekatima linu.

Faslu ya ne

Ze daula za pasiwa ne le katiba linu zikubali ukaya kazina utriya baho harumwa zehaki za dhwaminiwa ne daula yitso baho laki shariaan ha ustehi wo mwiliyano wahe zehaki yizo no mkayo ndro djimla harumwa daula yaki demokrasi.

Faslu ya tsanu

1. Kapvatsi ruhusa ya daula hau ikundi sha wandru hau mdru yitsokao wontsi ulona furswa ya hwandaliya zitrendwa zau ranganya haki hau unafasiya zakubaliwa ne le katiba linu wilo hau mdru uzibaya mfiya ha tafsiri yitso de ya lazimu.
2. Kayidja wafikiwa wo mkaziwa karo wahe ze haki mshindzi zaki binadamu zahisa za ndjiya ndziyani harumwa haina ntsi hau tegemeya tartibu zaki shariya, mwafikiyano, hau mila ha fasiri yaukaya kazi dja andzihwa harumwa lekatiba linu hau zidja pvenulwa hali ya utosha.

Djuzo ya raru

Faslu ya sita

1. Ze daula zadjifungatsa nele katiba linu yibidi zi stehi yeki yahazi, haina mdreu yafanye hazi yadjo uridhiwa niyo hau tumaini ye kuti yidjo urwaliya wo uhayati wahahe. Ze hatwa

za udafu yehaki yinu ngizo wadjibu ho djumwa mwana chama.

2. Ze hatwa za udafu ha ukweli yehaki ya hazi yilazimu zi dungane na djitihati za hu ilimisha wo msomo wa fani na hwandaliya barnamadji zidjo ufaliki mayendeleyo ya ankiba siyasa mayesha na utamaduni. Ndo udjadidisha wadjau hazi za uzimamiza le tumo na utzenga mishindzi yidjo upvama ze nafasi muhimu za siyasa na ankiba.

Faslu ya fukare

Ze daula wana chama wahe le katiba linu, ngazi hutadjilwao zipvame ye haki ya haina mdru ya ukana mashartwi mema ya hazi hususwan.

- a) Haina mdru wa hazi yahondrane na malipvo :
 - i. Mshahara walingana, na malipvo ya yadjibu ye hazi yamdru pvatzina utenguzi aswilan mahsus yahusu wo wandru washe ; wanu wapasiwa wakusudiwa namna ya ufanya hazi zi tsodjoka mtsini ne zaho wandrwaume. Wo mshahara utsikaye tafauti, ukaye wizani mdzima ne hazi ;
 - ii. M'yenshi wastara whaho wo wandruwashe ne ze djamaan zahao hama ne heli zawakinishiwa ne lekatiba linu.
- b) Nge lazimuwo hifadhui na urahafu harumwa ze hazi ;
- c) De bahat yaho wandru piya yau heziwa makamu ya hazi pvatsina shartwi yeka tsindo windji wamaha yahazi no udjuzi ;
- d) Wo uvumzi, ze ishrahi, ye hazi yikane muda waki binadamu, ne malipvo yahe ye feti ne ze conje yaparihane.

Faslu ya nane

1. Ze daula wanachama wahe lekatiba linu ngazirengao ahadi yeu dafi :
 - a) Yehaki yamdru udji uganya na wandru hau djimiza mazama yakidrwa hazi. Yemdrwa hazi ngena haki yadjiye harumwa ye chama yandzo yili uwaniya ze fayida zahahe

zaki ankiba, na maensha. Yehaki yinu yo udjuwa hu ahirishiwa harumwa twayifa laki demokrasi yeka yehifadhwi, wo utrulivu wahe ye ntsi zehaki no unafasiya ngizo yiipvilili djuwu.

- b) Yehaki yilona ye mazama yakidrwahazi ya udjimiza mikontsi na marengwe yaki twayifa, na ne furswa ya uhantsi na ushirkiyana na mazama yakitrwahazi ha daradja ya duniya.
- c) Yemazama yanu ngayona ye haki ya utekeleza ze dhwamana zahayo bila utriniwa baho litsokao lontsi yitso ne mabaho yaki shariyan ha madhmuni ya uhuyi wo utrulivu, ze haki y no uhuriya wa haina mdru.
- d) Yehaki yamziiyo hazi yilazimu yidunge ze shariya za haina ntsi ya.

- 2. Ye faslu yinu ngayi rhusuyo wo mzililiyo waki shariya wa sindika zahe pulisi, djeshi ne yidara yahe ze hazi za sirikali ho urumiya ye furswa ya grevu.
- 3. Ye zedaula zawafiki le anzmiyo lahe le chama laduniya lahe ze hazi (OIT) laho 1948 kazitzina rhusa ya urwariya ze nafasi zaki sindika ne hifadhwi yahazo, na uzirumiliya shariaan sha uzi kadamiza kinyume ne ze haki zadhukurulwa ne lekatiba linu.

Faslu ya shenda

Ze daula za wafiki lekatiba linu zikubali wurengeya djukumu wo mkayo ndro wa haina mdru ha daradja yahe le sanduku la mali la urumiliya wo mkayo ndro unu.

Faslu ya kume

Ye ze daula za pasiwa ne le katiba linu zi kubali :

- 1. Wo mhifadwhi na hu himiliya le dahoyikao ndo guzo yahe le twayifa ha ulipanga na usomesa wo muda piya le dahoyikao linu lidjo kaya mbinga yaho wo mtundo no ulezi waho wana wiliyo hontsini mwe ze dhwamana za halo. Ye ndola ngayi hutadjiyao ye ulolo ne ulolwa waridhiyane pvatsina urendzawa mvuu.

2. Hifadhwi mahsus na utundi ngelazimuo zikusudiwa wo wandru washe wa uzaya harumwa muda wastahiki kabliya na baandiya wo uzaya. Wo wadzadze wa fanyawo hazi yilazimu wa hundre uvumzi wodjo ulipwa hau uvumzi wudjo udungana ne ze shartwi zahe le sanduku la mali la uharamiya wo myenshi wa hawo.
3. Furswa mahsus za uhifadhwi na usayidiya wo uwana watiti piya na no wa balighi, pvatsina ubaguzi utsokao ontsi ha drendeza sababu za mzalihano hau za unduhuzo. Wo wana piya no wana mabalighi ngyilazimuyo wahifadhwiwa na urendwa zombo za utumi hau swilaha harumwa wo mudjtamaan. Yemdrw wudjo wo wana wanu harumwa hazi zidjo utriya shaka wo ubinadamu wahao, ye swiha wadjawu yidhuru ze ntcinda za udjikimiu harumwa ye maenssha, lazila ya hukumlwa ne shariya. Ze daula ngizona ye dhwamana ya udjitamka uhusu wo ushashi wa maha ya ruhusiwa ne shariya mwana yakena hazi ya mshahara.

Faslu ya kume na mwedja

1. Ze daula za pasiwa ne lekatiba linu, zikubali haina mdru ukana daradja ya maensha ya udjitosha ndaye ne le dahole hahe rangu shahula, mavazi, makayo ; wo menshi hahe ngelazimuyo udohenda na ubariki. Ze daula zinu ngizona ye djukumu ya udafii yehaki yinu haizo ngazi kubaliyo wo muhimu wa utriniya mvuu wo mshirkiyano ha daradja ya duniya.
2. Ze daula za pasiwa no mkataba unu holiho ngazi kubaliyo yehaki mshindzi ya haina mwana damu ya pukane ne twauni yapvo zi psiwa hutaarisha ha mshirkiyano no ulimwengo barnamadji zidj ufaliki le taradjiyo linu.
 - a) Ngiyo wadjibu ze daula zidjimize tartibu za ubarikisha le tumo no myesheho wahalo, na ne le bwanyiso lahe maadini yaliwawo ha urumiya nyidjuzi mbali na mbali, na ustaanrabu wa ki sayans. Niyo muhimu pva pandwa wo m'yilimisho yenama ya udjuwa na utsunguwa sha hula shendza fayida, na djusa ledima yili lekeza ye ze neema zaho ulanga.
 - b) Nge hutadjilwao bwanyiso wastwa lahe sh hula sha ho ulimengu ulawana ne ma

hutadjiyo ya haina ntsi baishe ye mihima ya duniya kayitsi mishashi harumwa ze ntsi zi huzao ne zi hulao ye shahula.

Faslu ya kume na mbili

1. Ze daula za pasiwa ne lekatiba lunu zi wafiki yehaki ya haina mdru uhondrana na swiha ndjema ya ankili na ziungo.
2. Mwengoni mwe ze anzma za utriya ndziyani ndo ufanya yeka yinu yepvenuhe :
 - a) Haizo ndo uwana no windji wahe ze nyafati hususwan ndz zaho wanaynile watiti hau tunda wo mhuwo ndro wahao ;
 - b) Ndo mrengezo ye daradja yaho urahafu harumwa ye miva yoontsi ya mensha na ya hazi zaki luzi ;
 - c) Ndo ukaliliya na uzihira ze mbwade zi sumpiyao ne zapvotntsi djuwu ne za sababishiwa ne ze hazi na zitrwadji pvamedja no mwano ne ze mbwade yizo ;
 - d) Ndo upanga ye zana mahsus za usayidiya ze lapitali piya na upveha msada waki twabibu wa udiriki wo wandru yeka pvadhwihiri wu wade.

Faslu ya kume na draru

1. Zedaula wanachama wahe lekatiba linu ngazikubaliyo yehaki ya msomo ya haina mdru. Zi wafikiyana ye ilimu yikaye swilaha ya haina mwanadamu yadjuwe ya dji kimu ha uhifadhwi ye sheo sha hahe, na ufaliki zayidi ye mastehi yahe zehaki zaki binadamu no uhuriya wahahe. Zikubali wadjau ye ilimu yiruhusu mdru ya djipange yake mdru wamaana harimwa le twayifa yatsangiye wo mrwaliyano, wo mwishiliyano no mparano baina yahe ma twayifa pvatsina utenguwa range, kabila, hau dini hau utriniya shiuno Wo Umadja Wamatwafa wupviriliye ye amani.
2. Zedaula za pasiwa ne lekatiba linu ziwafikiyana yehaki yinu ya ilimu yi tekelezihe :
 - a) Ngiyo wadjibu wo msomo mshindzi hu tsi lipvisiwa, wu hakiye wo wandru piya ;

- b) Wo msomo wa hari wa wahe ze aina soontsi hususwan nde misomo ya fani ne ya hazi hazi ngayi bidiyo yende na ukaya bure yili wo wandru piya wabahatishe ;
 - c) Wo msomo wadjuu nge lazimuyo uruhusu haina mdru yahudre ye furswa yahu udunga wulawana ne ze ntchinda zahahe ne ankili wende na ukaya bure ;
 - d) Wo msomo mshindzi na utriniwa djitihadi wukane djirma ha fayida yaho wandru watsu timisomo yatsini piya ;
 - e) Yilazimu wo msomo wu heziwa djuu he miva yoontsi, pvake drazi za usayidiya ha mali ye mna shiyoni. Wo warumishi wahe ze idara za msomo watsi puziziwa ne zana zahazi.
3. Ze daula wanachama wahe lekatiba linu zidjitoleya ustehi ye ze nafasi zaho waduhze wa ho wana watsauliye wo wana haho ze likoli wandzao yeka nga zitekelezao zeshartwi za hantsiwa ne daula. Hususwan ndo msomo ye dini yeka ngwaonao masulaha.
 4. Kapvatsi ruhusa ya urenga anzma yidjo ufasiri ye faslu yinu hau uziyiya wo unafsiya wahe marayia ne mazama yahao hau djimiza madjumba ya msomo na uya yendesa yeka ngayo harumwa ye ze ndziya za handziwa ne daula.

Faslu ya kume na nne

Haina daula mwana chama wahe lekatiba linu yikao nkayi dja wahi ya hantsi wo msomo wantsini harumwa daradja yitso ya malipviyo na ulazimishiwa ngayilazimu yipange mdaradja wa ustehi ye niukwa yinu harumwa muda wa maha miili. Na uwonesa tartibu za timu ukaya harumwa pandza la maha mishashi wo msomo mshindzi kaudjo ulazimishiwa w wurudi ukaye bure.

Faslu ya kume na ntsanu

1. Ze daula za wafiki lekatiba linu zikubali yehaki ya haina mdriu :
 - a) Ya renga funvu harumwa wo m'enshi wa kitamaduni ;
 - b) Yahondrane ne ze faida zaho mwedeleyo usoni waki sayans ;

- c) Yahondrane ne hifadwi yahe zefayida zaki bidamu nafsiya nezaki mali zalawana no mdrungo waki sayans, maadzishi nawaki swanaan wahahe milki.
2. Ze hatwa zidjo urengesheha ne zedaula wananachama mahe lekatiba linu yili udriya ndziyani ye haki yinu yilazimu zi tsire bavuni wo msimamizo ye myendeleyo no mshayishi ye sayansi no utamaduni.
 3. Ze daula zi kubali ustehi wo unafasiya waho mtafiti waki syans ne ze naanwu za mtrungo zootsi.
 4. Ze daula zi wafiki ze tanafu zalawana no mtriniyo mvuu wo mshirkiyano no mparano ha daradja yaki duniya harumwa ye sayans no wu tamaduni.

Djuzo ya nne

Faslu yakume na sita

1. Ye ze daula zikubali uyeleha midjarada yahusu lebakiya linu lahe lekatiba yidjodo pvenuwa ze ngao za pulwa yili udhibiti wo mstehilwa wahe zehaki za dhukululwa ne lekatiba linu.
2.
 - a) Hama ndeheli zawakinishiha harimwa lekatiba ye midaradja yoontsi ngayidjo upveshewa ye mwadzishi djimla wahe Djumyia ya madola, yili ya yiwasulshe lebaraza la ankiba na mensha hau yi ramatso.
 - b) Ye mwandzishi djimla wahe djumyia ya madaula ngudjo pveha yemidaradja yinu harumwa ye madjumba ya duniya ya mitwalaan mahsus hau baadhwi ya madjumba yahe zedaula wanachama wahe madjumba yanu ne mahala piya yilo wadjibu holiho ngizona wo udjuzi wa utunda na utwaliyi haina suala.

Faslu ya kume na mfukare

1. Ye ze daula za wafiki le katiba linu gazidjo upveha ye midjarada yahazo hapavi habapvi ha udunga barnamadji yidjo uhantsiwa ne she yikao shi shuhulihao ne ankiba no m'enshi waki mudjtamaan harumwa muda wa mwaha ulawana ne tarehi ya mtrillwa dziyani yahe le katiba linu, baanda hu uzisa ze daula Zawafiki le katiba linu ne madjumba mahsus yaki daula ya mtwalaan yadjo yadjo ushuhuliha.
2. Ye midjarada yiyo ngayidjo udjuwa udjuza ye ze bdrongowo za triya udziro za ziyaze daula yizo zatsu shinda za stehi ha undro ye ze wadjibu za andaliwa ne le katiba linu.
3. Yeka yitsoka pnahisa pvapvehwa taanrifa zahusu wo mva wadhukurulwa pvanu harumwa ye Djumuyian Ya Madola hau Djumba mahsus laki daula la mtwalaan la ntsi mwanashama wahe le katiba, kayina ukaya muhimu ya urudi tsena wandru wa pvehe ze taanrifa zila wizo. Yesayio ho udjuza ze analama mshindzi zahe ze taarifa zahisa za pvehwa zo utosha.

Faslu ya kume nane

Ha mudjibu yahe djukumu yarihwa le baraza la ankiba na maensha ne kanuni yahe Djumuyian ya Madola uhusu ye ze haki zaki binadamu ne ze haki mshindzi, gilona ye furswa ya ukubaliyana ne madjumba mahsusu ya mtwalaan wo mweleho ye zengao za parihana baanda utunduzi wahe miwakinisho yahe lekatiba yahisa yatriwa ndziyani. Ye midjarada yinu ngayidjo uonesha mifano djumwa ze anzma ne mahutadjiyo yakubaliwa ne ze mbawa ne madjumba yaki daula mahsus ya mitwalaan uhusu wo mkatro shawiri.

Faslu ya kume na shenda

Ye she yikao shi shuhulihanao ne Ankiba no m'enshi ngashidjo udjuwa shi redjeze ye midaradja yahe ze daula harimwa ye she yikao shi shulihanao ne zehaki zaki binadamu yili shi yitwaliyi shi towa mawoni djimla hau ha madhmuni ya utso shi djuza, yeka zi pasa, ye midaradja ya husu ze haki zaki binadamu zapvehwa ne ze daula, ha udunga ze faslu za kume na sita, kume na mfukare na ne midaradja yahusu zehaki zaki binadamu za pvehwa ne madjumba mahsus yaki daula yamtwalaan ha udunga ye faslu ya kume na nane.

Faslu yayishirini

Ye ze daula za kubali lekatiba linu ne madjumba mahsus yaki daula yamtwalaan yadjo utaradjiya ngadjo udjuwa wu waswilisha harumwa she yikao shi shuhulihanao ne Ankiba no m'enshi, mawoni hodjumwa ye mahutadjiyo djimla ya tekeleziwa ha udunga ye faslu ya kume na shenda hau ho djumwa haina waswiya djimla wuliyo harumwa mdaradja wahe she yikao shi shuhulishihanao ne ze haki zaki binadamu.

Faslu yashirini na mwedja

Ye she yikao shi shuhulihanao ne ankiba no m'enshi waho mudjtamaan ngashidjo udjuwa wu pveha wakati hata wakati midjaradja ho harumwa le Baraza Kuu lahe Djumuyian ya Madola yidjo ubaliya mdjimliso wahe ze habari zalawa ne bari ulawana ne ze daula zenyi utriya mhono lekatiba linu ne madjumba mahsus yaki daula yamtwalaan wahe ze hatwa za rengwa ne zengao zapulwa ha ustehi ze haki djimla za kubaliwa harumwa lekatiba linu.

Faslu ya ishrini na mbili

She yikao shi shuhulihao ne Ankiba no m'enshi waki mudjtamaan ngashidjo udjuwa unyenyeziza ye zikao zasaya zahe djumuyian ya ma dola ne zikao sifanao nizo na ne madjumba mahsus yaki daula yamtwalaan yadjo utradjiya yikao yo ushuhuliha na msada waki teknik, haina su'ala, yatokeya harimwa ye midjarada, yadhukuriwa ne lekatiba linu, lidjo usayidiya ye makungumanyo mbali na mbali yatekeleze haina dzima uwoni harumwa wo mva wahalo ho djumwa ze anzma zapvamwedja zaki madola zidjo ushinda zi sayidiye ho mtriyo ndziyani wakweli, ngao ha ngao, lekatiba linu.

Faslu ya ishrini na ndraru

Ye ze daula za kubali le katiba linu zi wafiki ukaya mwengoni mwe ze furswa zaki madola za utsongeza wo mtriyo ndziyani ye ze haki zakubaliwa harumwa lekatiba linu ngapvo wo mkubaliyano ma anzimiyo, na mataradjiyo, na msada waki teknik, na miwonano pvamwedja ne ze sirikali zitsahao, ha daradja ya bavu na miwonano yaki teknik ya faliki mbadiliyano fikra na mitwalaan.

Faslu ya yishirini na nne

Kapvatsi namna yahe le katiba linu lidjo utafsriha hau danganya le Anzimiyo Mshindzi lahe Djumuyian ya Madola hau ye madjumba mahsus yakidaula ya mtwalaan ne ze shariya mshindzi zahayo, madjumba ya twaliyao ze dhwamana za haina baraza hau yikao zahe Djumuyian ya Madola pvamwedja ne madjumba mahsus yakidaula ya mtwalaan uhusu y ma su ala ya shindjiya lekatiba linu.

Faslu ya yishirini na tsanu

Kapvatsi fikra yatokeya harimwa le katiba linu yidjo udjuwa utafsiriwa ha uwonesa mkadamizo wahe yehaki yawadjibu ya haina umati wa fayidishihe ha urumiya pvapvo na pvapvo, tsena ha unafasiya wo utadjiri ne maandini yaho ulanga wahao.

Djuzo ya tsanu

Faslu ya yishirini na sita

1. Lekatiba linu libuliwa wo mtriyo mhono halo haina daula mwanachama wahe Djumuyian ya madola hau mwanashama wadjumba mahsus laki daula la mtwalaan litsokao, hau daula yakubali she ikao sha mahakama yamadola, hau daula ya lalikiwa ne le Baraza Kuu lahe Djumuyian ya Madola yili ukaya mwanachama wahe lekatiba linu.
2. Ye lekatiba linu nge lazimuyo li kubaliwa kidaula ne zana zaho wo mkubali ngazidjo pveshewa ye Mwadzishi Djimla wahe ye Djumuyian ya madola.
3. Lekatiba linu ngalidjo ubuliwa haina nawu ya daula yadhukurulwa harimawa le kifu la handa lahe ye faslu yinu.
4. Ho mkubaliwa ukaya mwanachama wahe lekatiba linu ngawudjo uparihana ha upveha hutadjiyo rasmi ho fungwa ye Mwadzishi Djimla wahe Djumuyian ya Madola.
5. Ye Mwadzishi Djimla wahe Djuwiya ya Madola ngudjo djuza ye ze daula za sinya wo mkataba unu hau za ukubali ye mahutadjiyo ya mkubalihano ki rasmi yapveshewa.

Faslu ya yishirini na mfukare

1. Le katiba linu ngalidjo udjiya ndziyani mezi miraru baandiya wo usiku waho mbeho le hutadjiyo la mengo miraru na ntsanu la ukaya mwanachama wahe lekatiba linu.
2. Uhusu haina daula yidjo utriya mhno ki kirasmi le katiba linu hau yidjo ulikubali baandiya le hutadjiyo la mengo miraru na tsanu la ukaya mwana chama hau la ukubali ze fikra zahe lekatiba, lekatiba linu ngalidjo udjiya ndziyani mezi miraru baandiya wo mbeho le hutadjiyo rasmi la hayo la utriya mhono le mkataba hau ukubali ze fikra zahalo.

Faslu ya ishirini na nane

Ze satwa zahe le katiba linu ngazidjo urumilwa pvatsina mpaka, hau undhuri, fulani, ne mikowontsi mbali na mbali yapanga ze daula za mtsanganyiho.

Faslu ya yishiri na shenda

1. Haina daula ya ndjiya harumwa lekatiba linu ngayidjo udjuwa yipvehe hutadjiyo la mbadilisho ndrongo hawo hau pveha ye maandzishi ya wonesao ye madiliho ya andziwao ho hahe ye Mwandzishi Djimla wahe Djumuyian ya Madola. Woyi pvahe ngudjo pveha le hutadjiyo linu harumwa ze daula wanashama wahe lekatiba ha uwawuzisa yekaya ngwadzao pva parwa shiwara ne Djumuyian ya Madola uhusu le hutadjiyo la mbadilisho. Haina mabadiliho yakubaliwa no wendji wahe zedaula wanashama wa voti harumwa yeshiwara nga udjo yeleshewa le Baraza Kuu lahe Djumuyian ya Madola yili utaradjia ho mkubaliwa rasmi.
2. Ye mabadiliho ngayadjo udjiya ndziyani yeka yakubaliwa ne le Barza kuu lahe ye Djumuyian ya Madola ha udouga ze shariya za halo ha windji wa mafunvu mayili harumwa mararu yahe ze daula wanashama wahe lekatiba linu.
3. Yeka ye mabadiho yanu ya ndjiya ndziyani, ya lazimu ya pase ye ze daula za kubali uzivoti Ye ze daula za baki zi pasiwa ne ze fikra zahe lekatiba linu na ne mabadiliho yapvira yikao wa yakubali.

Faslu mengo miraru

Pvatsina udiwaza ye za hambwa harumwa le kifu la tsanu lahe faslu ya ishirini na sita, ye Mwandzishi Djimla wahe ye Djuwyian ya Madola ngudjo djuza ye ze daula za dhukurulwa harumwa le kifu la handa lahe ye faslu ya vumnulwa pvanu :

- a) Ngu djo djuza ye ze daula wo wa sinya lekatiba linu, pvamwedja ne ma hutadjiyo ya ukubali kirasmi ne ya ukubali ze fikra yadjo upveshewayo ha undunga ye faslu ya yishirini na sita ;
- b) Ngudjo trangaza wadjawu wo usiku wa mtriyo dziyani le katiba linu hama nde heli za hambwa harumwa ye faslu ya yishirini na saba na no usiku ye mabadiliho yadjo hwandisa urumilwa hama nde heli za dhukurulwa harumwa ye faslu ya yishirini na shenda.

Faslu mengo miraru na mwedja

1. Le katiba linu yikao li andzihwa ki shenuwa, ki spanya, ki farantsa, ki rusi yikao ze lugha yizo zoontsi ngizo shuhuda, ngalidjo uyehwa harumwa ye maktaba besheyo yahe ya Djumuyian ya Madola.
2. Ye Mwandzishi Djimla wahe ye Djumuyian ya Madola ngudjo pveha kopi yahe le katiba linu ya hakikishiwa sapvuzi ya yeraeya ye ze daula piya wanashama wahe le katiba linu.